



## VIZIJA RAZVOJA MJESNIH ZAJEDNICA OPĆINE ILIJAŠ

Ilijaš, juni 2022.godine

\*\*\*\*\*

Ul. 126. Ilijaške brigade br. 6, 71390 Ilijaš  
Tel. ++387 33 580-620, 580-690, fax. 400-505,  
Transakcijski račun kod RAIFFEISEN BANK BIH,d.d. Sarajevo: 1610000091470429  
e-mail [drustvenadjeatnost@ilijas.ba](mailto:drustvenadjeatnost@ilijas.ba)



Broj certifikata:HR 008740



***Polazeći od činjenice da je lokalna samouprava jedan od temelja ustavnog uređenja te da je mjesna zajednica jedan od najznačajnijih oblika učešća građana i građanki u procesu donošenja odluka na lokalnom nivou ali i oblika sa najdužom tradicijom,***

***Uzimajući u obzir opredjeljenje za razvoj lokalne demokratije u skladu sa principima Evropske povelje o lokalnoj samoupravi,***

***Svjesni potrebe da se učešće građana i građanki u donošenju odluka na lokalnom nivou treba poboljšati i da ga je na najbolji način moguće ostvariti kroz mjesnu samoupravu te saradnju mjesne zajednice i organa jedinice lokalne samouprave,***

***U želji da se građanima i građankama olakša pristup javnim uslugama te da se osigura lokalni razvoj po mjeri svakog građanina uz premisu da „niko ne smije biti isključen“,***

***Shodno odredbama Zakona o principima lokalne samouprave u Federaciji BiH i Statuta Općine Ilijaš gdje je predviđeno da jedinice lokalne samouprave u okviru svojih nadležnosti uspostavljaju organizaciju i stvaraju uslove za ostvarivanje mjesne samouprave, te da Općinsko vijeće kao organ odlučivanja utvrđuje općinsku politiku i prati njeno ostvarivanje, mi vijećnici, na sjednici Općinskog vijeća Općine Ilijaš, dana 29.06.2022.godine usvajamo:***

## VIZIJU RAZVOJA MJESNIH ZAJEDNICA OPĆINE ILIJAŠ

1. Vizija razvoja mjesnih zajednica Općine Ilijaš (u daljem tekstu: Vizija) temelji se na sljedećim principima:
  - **Reprezentativnosti** – kao principa koji podrazumijeva da u izboru organa mjesnih zajednica treba obezbijediti učešće što većeg broja različitih kategorija stanovništva kako bi se postigla njihova proporcionalnost zastupanja i rada, naročito vodeći računa o mladima, ženama i socijalno isključenim kategorijama.
  - **Odgovornosti** – kao principa koji podrazumijeva da mjesna zajednica mora biti odgovorna prema svojim građanima, ali i prema lokalnim vlastima. Legitimno izabrani predstavnici mjesnih zajednica trebaju odgovorno vršiti funkcije koje su im dodijeljene.
  - **Inkluzivnosti** – kao principa kojim se podstiče uključenost svih građana u rad i aktivnosti mjesnih zajednica, naročito žena, mladih i socijalno isključenih grupa.
  - **Koordinacije** – kao principa koji podrazumijeva unapređenje koordinacije, komunikacije i međusobne saradnje između mjesnih zajednica i organa lokalne vlasti kao i između mjesnih zajednica i građana i ostalih aktera od značaja za razvoj mjesne zajednice kao što su organizacije civilnog društva, komunalna preduzeća, lokalne javne institucije, ne ograničavajući se na navedeno.
  - **Transparentnosti** – kao principa koji podrazumijeva otvorenost za javnost i dostupnost informacija vezanih za rad mjesnih zajednica uključujući i informacije o načinu i izvorima finansiranja mjesnih zajednica.
  - **Profesionalizacije i osposobljenosti predstavnika mjesnih zajednica** – kao principa koji podrazumijeva povećanje nivoa profesionalizacije i osposobljenosti predstavnika mjesnih zajednica kroz kontinuiranu

edukaciju i obuku, te osiguravanje prenosa stečenog znanja i iskustava na sve buduće predstavnike mjesnih zajednica.

- **Nezavisnosti i depolitizacije** – kao principa kojim se nastoji omogućiti nezavisno i depolitizovano funkcionisanje mjesnih zajednica, kao predstavnika zajednice i građana i građanki u poslovnima zastupanja njihovih interesa kroz nezavisno donošenje odluka u skladu sa zakonom i statutom.
- **Demokratskog odlučivanja i participativnosti** – kao principa koji će osigurati demokratsko pravo na učešće u odlučivanju kao i pravo da građani i građanke imaju pravo da biraju i budu birani na pozicije koje obavljaju u strukturama uspostavljenih tijela mjesne zajednice.

2. **Vizija razvoja mjesnih zajednica u Općini Ilijaš sprovodiće se kroz četiri modela mjesnih zajednica:**

- Mjesna zajednica kao prostor za zagovaranje i pristup upravi;
- Mjesna zajednica kao mjesto za pružanje usluga stanovništvu;
- Mjesna zajednica kao društveni centar;
- Mjesna zajednica kao prostor za učešće građana u odlučivanju.

3. **Vizija razvoja mjesnih zajednica kroz model Mjesna zajednica kao prostor za zagovaranje i pristup upravi sprovodiće se kroz sljedeće identifikovane funkcionalne oblasti:**

- Afirmacija značaja i uloge mjesne zajednice kroz jačanje njenih struktura i iniciranje zagovaračkih akcija prema upravi i drugim institucijama i ustanovama;

- Utvrđivanje učinkovitih metoda i procedura za efikasnu komunikaciju između Općine i mjesnih zajednica sa posebnim akcentom na pružanje pravovremenih povratnih informacija predstavnicima savjeta mjesnih zajednica;
- Podizanje svijesti o potrebi većeg učešća žena u strukturama mjesne zajednice i akcijama koje mjesna zajednica vodi u svrhu osiguravanja kvalitetnijeg života za sve na području mjesne zajednice;
- Aktivniju uloga savjeta mjesnih zajednica u animiranju građana da uzmu aktivno učešće u javnim raspravama vezanim za budžet, strategije, urbanističko-planske dokumente, izmjene statuta, kao i u drugim pitanjima od značaja i interesa za građane u mjesnim zajednicama.

4. **Vizija razvoja mjesnih zajednica kroz model Mjesna zajednica kao mjesto za pružanje usluga stanovništvu sprovodiće se kroz sljedeće identifikovane funkcionalne oblasti:**

- Stvaranje minimalnih organizacijskih, prostornih i tehničkih uslova za rad svih mjesnih zajednica na području općine Ilijaš u skladu sa dobrim praksama u upravljanju mjesnim zajednicama, uvođenje programa obuke za osobe zadužene za rad sa mjesnim zajednicama kao i veća finansijska izdvajanja za troškove rada mjesnih zajednica;
- Unapređenje saradnje između nadležnih službi u Općini, javnih/ komunalnih preduzeća i mjesnih zajednica kako bi se obezbijedile odgovarajuće komunalne usluge građanima, podržale akcije zaštite životne sredine i osigurali planovi i podrška djelovanju u kriznim situacijama;
- Jačanje kapaciteta i uloge mjesne zajednice u kvalitetnoj podršci socijalno ugroženim grupama stanovništva ali i jačanje njihove uloge u organizaciji građanskih volonterskih radnih akcija.

5. **Vizija razvoja mjesnih zajednica kroz model Mjesna zajednica kao društveni centar sprovodiće se kroz sljedeće identifikovane funkcionalne oblasti:**

- Osiguranje infrastrukturnih i tehničkih uslova kojim će se dugoročno ispuniti uloga mjesnih zajednica kao društvenog centra kao i formalno-pravno uređenje korištenja prostorija mjesne zajednice kao društvenog centra, centra kulture i sporta;
  - Razvoj saradnje sa nevladinim organizacijama, naročito saradnje sa udruženjima koja zastupaju interese mladih, žena i osoba sa invaliditetom, i jačanje svijesti o ulozi nevladinih organizacija i mogućnostima za konkretnu saradnju mjesnih zajednica sa nevladinim organizacijama;
  - Kontinuirano izdvajanje namjenskih sredstava za kulturu, sport i društvena događanja, kao i podsticanje inicijativa koje promovišu aktivizam pojedinaca u mjesnim zajednicama;
  - Osiguranje pristupa i adekvatnih sadržaja za različite ugrožene skupine u mjesnoj zajednici kroz programe podrške Općine, donatorske programe i aktivniji angažman mjesnih zajednica.
6. **Vizija razvoja mjesnih zajednica kroz model Mjesna zajednica kao prostor za učešće građana u donošenju odluka sprovodiće se kroz sljedeće identifikovane funkcionalne oblasti:**
- Osiguranje prostora za okupljanje građana s ciljem njihovog učešća u procesima donošenja odluka na lokalnom nivou;
  - Utvrđivanje inovativnih mehanizama za proaktivnije učešće građana u javnim raspravama i drugim oblicima građanskog učešća u poslovima mjesne samouprave;
  - Afirmisanje djelovanje foruma građana kao oblika demokratskog odlučivanja, promocijom sadržaja koji prate organizaciju i ishode foruma;
  - Uspostavljanje učinkovitije komunikacije i većeg stepena informisanosti građana o pitanjima važnim za građansko učešće u donošenju odluka.
7. Slijedom ovog zaključka, Načelnik će u roku od 90 dana od dana usvajanja Vizije, putem svojih stručnih službi izraditi Operativni plan za implementaciju Vizije. Operativni plan treba da sadrži pregled svih projekata i aktivnosti koje će biti preduzete u narednom trogodišnjem periodu kako bi se

implementirala Vizija, a naročito u pogledu definisanih modela i funkcionalnih oblasti djelovanja mjesnih zajednica. Pored projekata i aktivnosti, Operativnim planom će se utvrditi i vremenski rokovi za implementaciju aktivnosti, očekivani rezultati, nosioci realizacije, neophodna finansijska sredstva, načini mjerenja učinaka i nadzora nad implementacijom Operativnog plana Vizije, kao i dinamika izvještavanja.

8. Kroz izradu Operativnog plana posebno je važno da se identifikuju oni projekti i aktivnosti koji će doprinijeti što većem uključivanju različitih kategorija stanovništva u organe mjesne zajednice, čime će se osigurati reprezentativnost i njihova proporcionalnost zastupanja i rada, a naročito vodeći računa o zastupljenosti žena i mladih.